

türlichen Dingen/ dem Einfalt der Menschen zu der Zeit zugeschrieben/ da wir als Christen auß dem Moyses vnd Gottes Wort sonsten gut Wissenschaft tragen/ Daß ein solche Blindheit vnd Unverstand der erschaffenen Dingen/ auß dem Fall vnserer ersten Eltern/ Adams vnd Euen/ gleich wie auß einem unreinen/ trüben/ vnklaren Bronn entsprungen vñ hergestossen sey. Den dadurch ist das helle Liecht vnd dz klare Aug menschlicher Veruufft also verfinstert vnd verdunckelt/ daß es gar wenig in natürlichen verborgenen Dingen hat sehen vnd mercken können. Derwegen es nit vngläublich scheint/ nach der Meynung des Hippocratis, Daß die ersten Menschen mehrentheil durch fleissige obseruationes, Anmerckung vnd tägliche Erfahrungheit/ gesunde Kräuter von vngesunden/ schädliche Thier von vnschädlichen/ giftige corpora von vngiftigen haben gelernt zu vnderscheiden/ daß ein Ahl zur Speiß dienlich wer/ aber nit ein giftig Schlange (so beynah gleiche Gestalt des Leibs haben) hat sie die Anmerckung gelert/ daß ein Krebs dem menschliche Leib vnschädlich/ ein Scorpion aber fast schädlich wer/ haben sie auß der Erfahrung angemerckt/ Daz Pomeranzen/ Quitten vñ dergleichen Apffel des Menschē Natur grossen Nutz vnd Frommen brächten/ der Coloquint Apffel aber/ denselben kein nutriment vnd Fütterung geben möchten/ Dessen seyn sie durch Anleitung der Erfahrungheit/ nit ohn grossen vieler Leut Schaden innen worden/ vnd solches ist von vielen vnzehlichen andern Exempeln zuverstehn.

Auß diesen Ursachen haben die ersten Menschen/ auß Nothzwang/ vmb ihres Heils vnd Wolfahrt willen/ die Gewächs der Erden/ die Fisch im Meer/ die Vögel in der Luft/ die wilden Thier auß dem Feld/ die Mineralia vnd Gewächs im Schoß der Erden/ &c. lernen erkennen vnd vnderscheiden müssen. Aber diß nit allein/ sondern sie haben eben so grossen/ ja beynah grossern Fleiß angewandt/ daß sie ein gebürliche Zubereitung Speiß vnd Tranccks/ zu erhaltung ihres Leibs vnd Lebens erfunden. Daz her seyn entstanden die Kräutner vnd Gärtner/ die Fischer/ die Jäger/ die Vogelfänger/ die Berckleut/ die Köche/ die Müller/ die Becker/ die Brezwer vnd dergleichen seltsame handwercks Leut mehr/ die zwar durch langwirige Anmerckung/ Nachdenckung vnd Erfahrung/ also weit kommen seyn/ daß sie nun mehr schwerlich höher steigen vnd kommen mögen/

jaß